

AWIG - AWIG
DESA PAKRAMAN BELATUNG



**DESA SENGANAN, KECAMATAN PENEHEL,
KABUPATEN TABANAN
WARSA 2002**

BANTANG AWIG - AWIG DESA ADAT

	Kaca
MURDDHA CITTA	1
PRATAMAS SARGAH ARAN LAN WEWIDANGAB DESA	1
DWITTIYAS SARGAH PATTTIS LAN PAMIKUKUH	2
TRITTIYAS SARGAH SUKERTA TATA PAKRAMAN	2
Palet 1 Indik Krama	2
Palet 2 Indik Prajuru lan Dulun Desa	5
Palet 3 Indik Kukul	7
Palet 4 Indik Paruman	8
Palet 5 Indik Druwen Desa	9
Palet 6 Sukerta Mapitegep	10
Kaping 1 Karang, Tegal lan Carik	10
Kaping 2 Pepayonan	11
Kaping 3 Indik Wewangunan	12
Kaping 4 Indik Wewalungan	12
Kaping 5 Bhaya	13
Kaping 6 Penyanggran Banjar	14
 CATURTHAS SARGAH SUKERTA TATA AGAMA	 14
Palet 1 Indik Dewa Yadnya	14
Palet 2 Indik Rsi Yadnya	17
Palet 3 Indik Pitra Yadnya	18
Palet 4 Indik Manusia Yadnya	21
Palet 5 Indik Bhuta Yadnya	21
 PANCAMAS SARGAH SUKERTA TATA PAWONGAN	 22
Palet 1 Indik Pawiwahan	22
Palet 2 Indik Nyapihan	23
Palet 3 Indik Sentana	23
Palet 4 Indik Warisan	24
 SASTHAS SARGAH WICARA LAN PAMIDANDA	 24
Palet 1 Indik Wicara	24
Palet 2 Indik Pamidanda	24
 SAPTAMAS SARGAH NGUWAH - UWAHAN AWIG - AWIG	 26
ASTAMAS SARGAH SAMAPTA	26

MURDHA CITTA OM AWIGHNAM ASTU NAMA SIDDHAM

Sembah bakti miwah pangastawan titiang majeng ring paduka Bhatara-Bhatari sesuhunang titiang sami, riantukan melarapan panghyaning kalih pasuecan Ida Sang Hyang Widhi Wasa asung kerta waranugraha ngesti jagat jangkep rawuhing sedagingnya sami, mawinang wenten kahuripan sekala niskala ring Bhuwana Agung miwah Bhuwana Alit. Manut dresta, Desane kamanggehang dados pasayuban Krama Desa rawuhing kulawarga pawonganye sami, mewastu raris Desane kemenggahang pinaka pawakan Bhuana Agung, pawongnya kemenggahang pinaka pawakan Bhuwana Alit.

Setaning pawakan Bhuana Agung, Desane taler kemenggahang pinaka pawakan bhawa mahurip, sane ka kacirenin antuk wentene pakilit Tri Hita Karana sane dados pasahang, luwire :

ha. Parhyangan, sahanan parhyangan panyiwian Desa, genah ngarsana bhawan Ida Sang Hyang Parama Wisesa, pinaka jiwaan Desane;

na. Pawongan, gebogan Krama saha warga Desa maka sami pinaka bayu pramanan Desane, mawinan Desane prasida molih prawarti;

ca. Palemehan, sahananing tanah kekuwuban wewidangan Desa, pinaka atulan Desane.

Adung patemoning Bhuwana Agung ring Bhuwana Alit, maka larapan ngupadi santa jagadhita, punika sinanggeh murddhaning prayojana pangriptaning awig-awig iki, rikala paseban sami Krama Desa Adat Belatung pinaka sepat siku-siku pematut miwah pamutus wastu kasidan prayojana kabeh, prasama angidep muah amageh aken linging awig-awig kadi ring sor iki.

PRATHAMAS SARGAH ARAN LAN WEWIDANGAN DESA

Pawos 1

- (1) Desa Adat puniki mawasta Desa Adat Belatung.
- (2) Jebar kekuwub wewidangannya mawates nyatur desa :

ha. Sisi wetan Tukad Yeh Panan.

na. Sisi kidul Subak Abian Swan.

ca. Sisi kulon Tukad Yeh Marga.

ra. Sisi lor Setra Banjar Adat Keridan

- (3) Jebar kekuwub wewidangan sane kawengku antuk wates - wates inucap wenten 40 Ha.
- (4) Sane kamanggehan ngranjing dados kekuwub wewidamham Desa Adat puniki, manut dresta Luwire :
 - ha. Pupulan karang paumahan sane sinanggeh palemahan Desa Pakraman.
 - na. Setra, carik miwah tegal sane wenten ring kekuwub wewidangan desa Adat Puniki sajabing palemahan Desa Palemahan Desa pakraman, manggeh ngranjing dados Tlajakan Desa Adat Belatung.
- (5) Desa Adat puniki kaepah dados 1 (siki) banjar :
- (6) Awig-awig, Pararem miwah sahanan Pasuaran Desa, manggeh kajejerang ring jebar kekuwub wewidangan Desa Adat puniki sami.

**DWITIYAS SARGAH
PATITIS LAN PAMIKUKUH
Pawos 2**

Desa Adat Belatung ngamanggehang pamikukuh, minakadi :

- (1) Pancasila
- (2) Undang - undang Dasar 1945, pamekas pasal 18
- (3) Tri Hita Karana, manut sadacara Agama Hindu

Pawos 3

Luwir Patitis Desa Adat Belatung

- (1) Mikukuhin miwah ngrajegang Sang Hyang Agama
- (2) Nginggilang tata prawretin maagama
- (3) Ngrajegang kasukertan Desa saha Pawongannya sekala lan niskala

**TRITIYAS SARGAH
SUKERTAN TATA PAKRAMAN
Palet 1
Indik Krama
Pawos 4**

- (1) Sahananing sang jenek mapaumahan ring wewengkon wewidangan Desa Adat Belatung sinanggeh warga Desa.

- (2) Warga Desa inucap ring ajeng, linggihnyane wenten 2 (kalih) soroh :
- ha. Warga Desa sane maagama Hindu tur sareng nyungkemin Kahyangan Desa Adat Belatung sinanggeh Krama Desa Adat Belatung.
 - na. Sajaba punika. sinanggih Krama Tamiu, sane kasulurang manut pararem.

Pawos 5

Dasar Pekraman :

- (1) Sahana Warga Desa sane sampun marabian, patut ngawit dados Krama Desa.
- (2) Satunggil Krama, manut karendahan kulawarganya, patut keni sinalih tunggil ayah-ayah :
 - ha. Ayahan Ngarep
 - na. Ayahan Balu
- (3) Sasengker ngawit tedun ngayah :
 - ha. Marep ring Krama Desa sane mawit saking pawiwahan, tedun ngayah saking puput nakala-kalan.
 - na. Marep ring Krama Desa sane mawit saking ngarangin, kasulurang manut pararem.
- (4) Krama Desa sane wenang nyade yan sampun kapastika, luwire :
 - ha. Sungkan tahunan;
 - na. Yan sampun maderbe pengentos utawi panyeledi ;
 - ca. Risampun mayusa 60 warsa utawi manut pararem.
- (5) Sang saking sewosan desa yan sareng tedun makrama desa ring Desa Adat Belatung patut keni batu-batu utawi pamogpog, sane agentya kasulurang manut pararem.
- (6) Yening wenten krama saking sewosan desa sareng ngranjing makrama desa ring Desa Adat Blatung patut kadulurin antuk surat keterangan sane jangkep.

Pawos 6

Wusan dados Krama Desa, luwire :

- (1) Sangkaning :
 - ha. seda
 - na. pinunas ngraga, manawi mangingsir linggih saking wewengkon Desa Adat Belatung.
 - ca. kanorayang, malantaran piwal ring awig-awig miwah Pararem Krama Desa, utawi tan matinut ring pituduh Prajuru sejeroning indik uyupat sikian, minakadi nenten prasida ngesehin prawerti;
 - ra. Tat-titine nitenin wusan dados Krama Desa inucap ring ajeng, kasulurang manut pararem.

- (2) Sang wusan dados Krama Desa tan polih pahpahan druwen desa, miwah tan polih pasayuban malih sajeroning ala ayu.

Pawos 7

Sahanang Krama Desa, patut keni tetegenan ayah-ayah, luwire :

- (1) Ayahan ngarep, mapitegs paturunan miwah ayahan mamungkul saking krama ngarep.

- (2) Ayahn Balu, luwire :

ha. Balu remban, sane pianaknyane kantut alit-alit, punika keni ayahan balu remban, sane kasuluran manut pararem.

na. Balu ngelintik, keni ayah-ayahan balu manut balunnya, yan lanang ayahan lanang yan istri keni ayahan istri.

- (3) Ritatkala ngardi wewangunan kabuat Desa adat, kramane sajabana keni ayahan manut pawos 7, taler keni paturunan sekadi ring sor :

ha. Paturunan samawibhaga manut pararem.

na. Dana punia, manut kelascaryan sang medana punia.

- (4) Krama Desa, kedadosang :

ha. Mapuankid utawi tan tedun ngayah/parum :

1) Ritatkala nangun yadnya, kaluasan masengker dewasa ;

2) Keni dedawuhan saking Guru Wisesa;

3) Kapialang luwire : sungkan, matepetin, kelayusekaran, lan sakancan punika.

na. Dados ngwakilan ring jdma tiosan, sane sampun menek daa/teruna.

ca. Dados mopog utawi numbas ayahan, prada :

1) Dados Pegawai Negeri utawi Pegawai Perusahaan Swasta;

2) Megenah ring desa sewosan malantaran ngreher pakaryan.

ra. Dados nyeledi nyuksukin Krame Ngarep yan sampun mayusa 17 warsa.

Pawos 8

Kapatutan Krama Tamiu :

- (1) Krama Tamiu, patut madana punia ring Desa Adat, manut pararem.

- (2) Krama Tamiu, patut polih pasayuban marupa pitulung rikenjekan katiban pancabhaya.

Pawos 9

Paturunang miwah Leluputan :

- (1) Paturunan utawi peson-peson sajeroning ngulati kasukertan Desa Adat kapitegenang ring Krama Desa Adat.
- (2) Desa Adat maweh leluputan ayah-ayah miwah peson-peson ring sang inggiling linggih miwah sang kawelas arsan.
- (3) Sor singgih leluputan miwah bacakan sang polih leluputan, kaunggangang jeroning pararem.
- (4) Sajawaning Prajuru Desa, sane taler pastika polih leluputan luwire :
 - ha. para sadhaka, minakadi Pemangku Khayangan/Panyiwian Desa, lan panyada ;
 - na. Para serati lan sutri;
 - ca. sang sungkan tahunan ;
 - ra. Wong cedaangga banget ;
 - ka. Wong ubuh meme bapa, jantos mayusa 17 warsa.

PALET 2

INDIK PRAJURU LAN DULUN DESA

Pawos 10

- (1) Desa Adat Belatung kaenter antuk Prajuru Desa, kamanggala antuk Bendesa Adat.
 - ha. Mawiwit saking krama ngarep utawi pangele;
 - na. Kaadegang Prajuru malantaran antuk pamilihan jeroning paruman Krama Desa, nyabran 5 warsa, sejawaning wenten pariindikan tios, tur sang sampun puputing panumaya, kengin kapilih malih ;
 - ca. Madulurang atur piuning ring Pura Desa.

Pawos 11

- (1) Bendesa Adat, karombo antuk :
 - ha. Penyade, pinaka wakil Bendesa Adat.
 - na. Panyarikan, pinaka juru surat.
 - ca. Patengen, pinaka pangemong druwen desa.

- ra. Kasinoman, pinaka juru Gumenceng.
- (2) Sajeroning ngenterang kasukertan keniskala, Bendesa Adat, patut misinggihang Pamangku Kahyangan Desa.
- (3) Prajuru Desa taler ngadegang Dulun Desa utawi Panglingsir, sane sinanggeh Kerta Desa, mawit saking Prajuru sane sampun puputing panumaya, sang wikan ring adat miwah agama, Kepala Desa miwah sane lianan, sane kasulurang manut Pararem.

Pawos 12

- (1) Swadarmaning Bendesa Adat, luwire :
- ha. Ngenterang paruman - paruman Desa
- na. Ngenterang panglaksanaan sadaging awig - awig miwah pamutus - pamutus Krama Desa, sane sinanggeh Pararem.
- ca. Ngraksa miwah nudonang tat - titine migunayang sarajabrane druwen desa.
- ra. nuntun saha ngenterang krama desa rawuhing warga desa sami, ngupadi kasukertan sekala lan niskala.
- ka. Nuntun saha nyaksi upacara sangskaraning kahuripan sane mabuat, minakadi sane ngilitang sulur pakulawangan.
- da. Nuntun saha ngenterang warga desa nginggilang Sang Hyang Agama, kasucian Kahyangan, kasucian palemahan, kasucian pawongan, miwah tata- titine mingunayang setra.
- ta. Mawosin miwah niwakang pamutus marep ring wicara warga desa.
- sa. Ngwakiling Desa, matemuang bebawos ring sapa sira ugi.
- wa. Lan sane sewosan sane wenten pakilitnya ring desa.
- (2) Tata - titine ngelaksanayang swadharma inucap ring ajeng, tan maren patut satunut ring daging awig - awig, pararem, dresta, miwah pamutus paruman desa.
- (3) Panglaksanane ring ajeng patut kasiaran ring desa kapungkuripun.
- (4) Sumakuta utawi sumanggup natak pamutus paruman Desa ngeninin swadharman sowang - sowang Prajuru.

Pawos 13

- Patias utawi olih - olihan Prajuru / Dulun Desa, luwire :
- ha. Luput reramon utawi peson - peson
- na. Luput paturunan marep ring kabuatan Desa
- ca. Polih Tanding tengah
- ra. Patias sewosan manut pararem.

Pawos 14

- (1) Prajuru/Dulun Desa, kapilih nyabran 5 warsa, ngawit saking padiwasane kaadegang Prajuru/Dulun Desa.
- (2) Prajuru/Dulun Desa sane suadarmannya sampun puputing sengker, kengin kapilih malih.
- (3) Pariindikane ngadegang Prajuru/Dulun Desa sakaluwire, kapastikayang melarapan paruman Krama Desa tur kaingkupin antuk Krama.
- (4) Wusan dados Prajuru/Dulun Desa, sangkaning :
 - ha. Lina;
 - na. Pinunas ngaraga malantaran jalaran sane pastika ;
 - ca. Swadharmanya sampun puputing sengker;
 - ra. Kawusanang/ kanorayang olih Krama Desa duaning iwang pamargi menawi nilar sasana.
- (5) Ngentosin, ngwusanang utawi nganorayang Prajuru/Dulun Desa, patut kamargiang sejeroning Paruman Krama Desa tur kaingkupin antuk Krama Desa.

PALET 3

INDIK KULKUL

Pawos 15

- (1) Dudonang kulkul Desa Adat Belatung, luwire :
 - ha. Kulkul Desa;
 - na. Kulkul Sekaa-sekaa;
- (2) Kulkul Desa kamanggehang pinaka piranti utawi sarana tatenger maka wangsit ring wawongkon wewidangan Desa.
- (3) Tatepakan suaran Kulkul manut dresta, tur anggah-ungguh tatepakan ipun kaungganghang jeroning pararem.

Pawos 16

- (1) Kulkul Desa, tan wenang katepak yan tan sangkaning pituduh prajuru, sajawaning tengerang kapancabhayan.
- (2) Sang nepak kulkul Desa, tan sangkaning pituduh prajuru, patut digelis atur upekse maka panepakan ; yan piwal, sang mamurug wenang katibakin danda, manut parerem.

- (3) Kulkul sekaa-sekaa miwah kulkul pondokan-pondokan, tan kalugra nyawerin utai matehin sukut miwah tatepakan Kulkul Desa, prada mamurug, sang mamurug taler wenang katibakin danda, manut pararem.

Palet 4

INDIK PARUMAN

Pawos 17

- (1) Dudonan Paruman ring Desa Adat Belatung, luwire :
- ha. Paruman Krama Desa, kawentenang saistannya apisan jeroning awarsa utawi manut kabuatan, sane karihinin antuk tetibak arah-arah.
 - na. Paruman Padgatakala, rehning wenten indik sane dahat mabuat sane pacang kebawosan, sane karihinin antuk tetibak arah-arah.
 - ca. Paruman Prajuru/Dulun Desa, kawentenang manut kabuatan.
 - ra. Paruman sekaa-sekaa, kawentenang manut kabuatan.
- (2) Pamargin Paruman Krama Desa, patut nganutin dudonan :
- ha. Paruman wahu kengin kakawiten sesampune kateduning antuk pinih kedik kalih pah tiga lintang saking sang patut ngamiletin, kamanggala antuk tengeran suaran kulkul mabusana Adat Bali, tan kalugra makta gegawen sakaluwire, karihinin antuk ngarcana Bhagawan Panyarikan majalaran Widhi Widhana lan cane.
 - na. Maka pangawit, kalaksanayang panyacak pangesepe, karuntutin antuk nyacak dedosan, wahu kalanturang antuk parum ; sesampun parumane puput, patut kacacak malih, tur sane kasepe, sang ninggal paruman miwah sane nosa, wenang katibaking danda, sane ageng alit ipun, kasulurang manut pararem.
 - ca. Maka pamastika wahu kengin nyacak pangasepe, kasulurang manut pararem.
 - ra. Sejeroning paruman tan kalugra ngwetuang wak ghora minakadi ngardi biota ; sang mamurug, wenang keni pamidanda bea pacamil, sekadi dandaning aguman-uman ring paseban, sane kasulurang manut pararem.
 - ka. Pamutus bebaos sane briuk sapanggul utawi ingkup, punika sane kaaptiang tur kamanggehang.
- (3) Prada daging paparuman nenten kaingkupin, Prajuru/Dulun Desa mangda ngilikang bebaos, saha pamutusnya mangda kararemin antuk Krama Desa ; bilih jantos ping tiga taler nenten prasida kaingkupin Prajuru Desa dados nunas bawos ring Kerta Desa; bilih pamutus Kerta Desa taler nenten kaingkupin, Prajuru Desa kengin nunasang indika punika ring Sang Maraga Guru Wisesa.

Pawos 18

- (1) Sajeroning Paruman Krama Desa, Bendesa Adat patut nyiarang pamargine ngenterang Desa, pamekas ngeninin indik :
 - ha. Munjuk lungsurin gebogan pakraman saha ayah-ayah nyane, minekadi sulur artha brana fruwen desa.
 - na. Pangrancangan Prajuru, ngeninin utsahan Desane kapungkur.
- (2) Pamutus Paruman Krama Desa sinanggeh Pararem, kamenggahang maka pamiteges panglaksanaan awig-awig.

Pawos 19

- (1) Paruman Prajuru/Dulun Desa, kawenangan wantah ngrincikang pangrencana marep ring utsahan Desane kapungkur.
- (2) Paruman Prajuru Desa, tan kawenangan ngamedalang tategenang ring Krama Desa, saderenge kaingkuping antuk Krama Desa.
- (3) Pamutus paruman Prajuru/Dulun Desa, kengin ngwetuang pasuara manut daging pituduh sang ngawarat, utawi ngonekang pamutus sane pecak sampun dados Pararem Krama Desa.

PALET 5

INDIK DRUWEN DESA

Pawos 20

- (1) Sane kamenggahang dados druwen Desa Adat Belatung luwire :
 - ha. Kahyangan Desa, luwire :
 - 1) Kahyangan Tiga : Pura Desa, Pura Puseh, Pura Dalem.
 - 2) Kahyangan druwen Desa sewosan ring Kahyangan Tiga, minakadi :
 - na. Pura Tegeh/Catur
 - ca. Taman Beji
 - ra. Meraja Pati, Gedong Tapakan
 - ka. Setra 10 are
 - da. Palaba Pura, marupa tegal 3,5 are.
 - ta. Lelangwan, minakadi tetabuhan lan ilen-ilendruwen Desa luwire :
 - 1) Ilen-ilen ring Pura : Barong Rentetan.

- 2) Lekita-lekita : pipil, awig-awig, pasuaran, pararem.
- (2) Olih-olihan Desa Adat Belatung mawit saking :
 - ha. Upon-upon palaba Pura;
 - na. Paturunan saking Krama Desa;
 - ca. Dana Punia tiyosan sane patur;
- (3) Sanangken Paruman Krama Desa, Bendesa Adat patut nyiarang munjuk lungsur upon-upon laba Pura lan sapanunggalannya sane sinanggeh druwen Desa.
- (4) Upon-upon palaba pura lan sapananggulannya, kangen prabea piodalan miwah wewangunan ring Pura. taler prabea tiosan marep ring kabuatan Desa Adat.
- (5) Sakaluwiring druwen Desa patut wenten lekitanya sane pastika.
- (6) Tan kalugra ngadol utawi ngesahang druwen Desa yang tan kacumponin antuk Krama Desa sami.

PALET 6
SUKERTAN MAPITEGEP
 Kaping 1
KARANG TEGAL LAN CARIK

Pawos 21

- (1) Krama Desa sane ngemong karang Desa utawi karang pumahan ngraga, patut ngwatesin karangnya sowang-sowang antuk pagehan/turus utawi tembok, mangda pakantenannya asri.
- (2) Watese sane mawasta gegaleng kaluan miwah gegaleng kateben mangda nganufin dresta, tur kakaryanin olih sang negen wates inucap.
- (3) Prade karasayang pagehang/turus inucap nglikadin, yan pada arsa pnyandinge, watese kengin nganggen pinget utawi pracihna pal saking Agraria, sakewanten kasaksi antuk Prajuru Desa.
- (4) Prade wenten karang kabebeng, mangda kautsahayang wenten pamesuannya sane pastika.

Pawos 22

- (1) Sinalih tunggil Krama Desa, nenten kelugra:
 - ha. Ngalah-alah, karang desa, tegal ayahan desa/carik krama lian, lan sakancan punika :

- na. Ngalah - alah tegak Kahyangan, Setra, lan sakancan tegak sane sinanggeh suci.
- (2) Prade wenten mamurug kecape ring ajeng, sang mamurug, patut ngwaliang tanah inucap, tur sang alah - alah tegak suci, tiosan ring ngwaliang tanah tegak suci inucap, taler patut karuntutin antuk dewa danda miwah artha danda, sane kasulurang manut pararem.

Kaping 2

PEPAYONAN

Pawos 23

- (1) Ngawit nandur pepayonan minakadi tanem tuwuh, patut adepa agung ngajeroang saking wates ; pepayonan minakadi tanem tuwuh sane jantos ngliwat wates, wenang kasepat gantungin.
- (2) Pepayonan sane ngungkulin, mawasta mayanin ka pisaga, sang nruwenang pepayonang inucap patut kawara tur kairing mapiguman antuk sang rumasa katetehan, bilih - bilih sang nruwenang, arsa ngrebah utawi notor pepayonan punika.
- (3) Pradene sampun kawara taler tan wenten utsahan sang nruwenang, sang rumasa katetehan wenang masadok ring Prajuru, tur risampune kaparitas kandugi wenten lelugrahan Prajuru, wahu wit pepayonan punika kengin karebah, sakewanten panukun patin wit pepayonane punika patut katahur olih sang rumasa katetehin manut panglokikan sang nepasin, tur wit pepayonane sane karebah punika, kasukserahang ring sang nruwenang.
- (4) Sang patut keni pamidanda panyangskara saha prabea manut pararem, marep ring wewangunan sang karubuhan, luwire :
- ha. Sang nruwenang wit pepayonan, sane sinanggeh mayanin, pradene pungkut tur ngerubuhin wewangunan krama tiosan ;
- na. Sang notor, monggol utawi ngrebah taru, tur ngrubuhin wewangunan krama tiosan.
- (5) KKrama desa patut ngamanggehang kawredian tanem tuwuh sane ngawinang Desane asri tur lestari sane kawastanin Bhuta Hita sane mategep kalestarian lingkungan hidup.
- (6) Sinalih tunggil krama sane pacang ngrebah pepayonan minakadi tanem tuwuh sane ngawinang Desane asri tur lestari. patut masadok ring Prajuru.

Kaping 3 WEWANGUNAN

Pawos 24

- (1) Nyabran ngwangun, sowang - sowang krama patut :
 - ha. Masadok ring Prajuru, pamekas marep ring wewangunan sane mapanyaitan minakadi menengin wates ;
 - na. Ngangge Asta Bhumi miwah gegulak Asta Kosali, sanistannya manut ring patitise ka niskala ;
- (2) Prade wewangunane jantosnyayubin ka pisaga, bilih - bilih temboke ring telenging wates, risampune kawara tur kairing mapiguman taler tan wenten utsahan sang nruwenang, kangkat kasadokang ring Prajuru ; sesampune kaparitas tur wenten lelugrahan Prajuru, sang nruwenang wenang keni danda manut pararem, tur tembok inucap patut kagubar oleh sang nruwenang, sanistannya mangda kakaryanang abangan.

Kaping 4 WEWALUNGAN

Pawos 25

- (1) Sahanan warga sane miara wewalungan : babi, banten, lan sakancan ipun, mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilih - bilih jantos ngranjing ngletehin Kahyangan.
- (2) Prada wenten wewalungan malumbar utawi ngeleb tur ngrusak karan utawi pabian krama sewosan, risampun kawara taler nenten wenten utsahan sang nruwenang, yan wewalungan punika malih ngrusak karang utawi pabianan krama sewosan, wewalungan inucap kengin kataban, tur sang nruwenang wenang katibakin danda ngwaliang panukun wit tetanduran sane karusak, saha nahur panebas pepiaraan tetabanan, manut panglokikan Prajuru Desa.
- (3) Prade wenten wewalungan ngranjing jantos ngletehin genah suci, minakadi kahyangan, pamrajan lan sakancan punika, risampune kaparitas antuk Prajuru, sang nruwenang wewalungan inucap wenang keni dewa danda lan artha danda, agung alit ipun manut kecap sastra agama, sane kapikukuh antuk Krama Desa.

- (4) Krama Desa patut nyerayanin wewalungan miwah sarwa prani, tan kapatut mademang paksi, nuba ulam lan sakancan punika, pinaka sinalih tunggil utsahan Krama Desa ngardi Bhuta Hita.
- (5) Sang mamurug kecape ring ajeng, wenang keni danda manut pararem.

Kaping 5

BHAYA

Pawos 26

- (1) Bacakan bhaya, luwire : jiwabhaya, arthabhaya, agnibhaya, toyabhaya, lindubhaya, lsp, sane ketahipun kawastanin pancabhaya.
- (2) Sinalih tunggil krama sane manggihin prasihna pastika wentene sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
- (3) Prada Desane kahanan jiwabhaya, Krama Desane patut ngaturang upacara pamahayun Desa manut kecap sastra agama sane kapikukuh antuk krama, tur sang ngwetuang jiwabhaya, katur ring sang ngawawenang.

Pawos 27

- (1) Sinalih tunggil krama sane manggihin prasihna pastika wentene artha bhaya (kamalingan), patut digelis nepak kulkul tengeran pamitulung manut pawos 15 (4) utawi pawos 16 (1); sang kamalingan patut atur supekta ring Prajuru; sang kacihna ngamaling, katur ring sang ngawawenang, maweweh malih patut keni dewa danda manut pararem, yan ipun ngamaling barang druwen desa sane sinanggeh suci.
- (2) Sowang - sowang Krama Desa tan kapatut mapailonan ring dusta; sang kacihnan mapailonan ring dusta patut katibakin danda kadi dandaning maling, sane kasulurang manut pararem.
- (3) Indik ngrereh reramon minakadi daun kelapa, ron, miwah sane sewosan ring pabianan krama tiosan ri kenjekan suwung, kasulurang manut pararem.
- (4) Indik ngranjingin pakubon utawi pakarangan krama sewosan rikala suwung, mawasta raris sang maderbe pakubon utawi pakarangan kaicalang, kasulurang manut pararem.

- (5) Indik ngranjingin pakubon utawi pakarangan krama sewosan rikala suwung riantukan wenten pisarat sane mabuat, minakadi mapangarah miwah kabuatan sane lianan, kasulurang manut pararem.

Kaping 6

PENYANGGRAN BANJAR

Pawos 28

- (1) Krama banjar ring sawewengkon Desa Adat Belatung patut serang nyanggra karya suka dukan sowang - sowang Krama Desa.
- (2) Tetibak panyanggrane inucap ring ajeng, kasulurang manut pararem.
- (3) Sowang - sowang Krama banjar sane pacang nangun karya suka duka sane mabuat, mangda masadok ring Prajuru.

CATURTHAS SARGAH SUKERTAN TATA AGAMA PALET 1 INDIK DEWA YADNYA

Pawos 29

- (1) Kahyangan -kahyangan panyiwian Krama Desa Adat Belatung, luwire :
 - ha. Kahyangan Tiga : Pura Desa / Bale Agung, Pura Puseh, pura Dalem
 - na. Kahyangan - kahyangan panyiwian Krama Desa tiosan ring Kahyangan Tiga : Pura Tengah / Catur, Taman Beji, Merajapati, Gedong Tapakan.
- (2) Tegak piodalan ring sowang - sowang kahyangan inucap ring ajeng, kamanggehang sakadi ring sor puniki :
 - ha. Pura Desa / Bale Agung ring rahina Anggara Kasih, Wuku Dukut
 - na. Pura Puseh ring rahina Anggara Kasih, Wuku Dukut
 - ca. Pura Dalem ring rahina Buda Wage, Wuku Menail
 - ra. Pura Tengah / Catur ring rahina Tumpek, Wuku Wariga
 - ka. Taman Beji, ring rahina Purnamaning Kedasa
 - da. Merajapati ring rahina Budha Wage Wuku Menail
- (3) Pamargin pangacine ring sowang - sowang kahyangan inucap ring ajeng, manut kecap sastra Agama, saha kalaksanayang kanista, madhyama, utama, manut manut kawentenang krama sane kaingkuping jeroning pararem.

Pawos 30

- (1) Ring sowang - sowang Pura inucap ring ajeng, patut kaadegang Pamangku.
- (2) Pidabdab ngadegang Pamangku, nganutan dudonan :
 - ha. Ngwilang saking turunan utawi ngwaris ;
 - na. Malantaran nyanjan utawi nuhur ring Pura sane karerehang Pamangku ;
 - ca. Malantaran kapilih antuk Krama Desa.
- (3) Sang tan wenang kaadegang dados Pamangku, luwire :
 - ha. Cadangga, luwire : peceng, perot, cungh lan sapanunggilannya ;
 - na. Sapa sira ugi sane nenten kapatutang manut pararem ;
 - ca. nandang sakit ila, ayan, buduh miwah pinungkan sane tan keneng tinamban ;
 - ra. Sang mederbe parilaksana nenten becik.
- (4) Prabea Kapamangkuan :
 - ha. Prabean upakara / upacara Adiksa Widhi utawi ngwintenang Pamangku, kamedalin miwah kalaksanayang antuk Krama Desa.
 - na. Marep ring prabean Pitra Yadnya ring Pamangku, Panyade, Serati, Sutri, yan seda ri wekas, Krama Desane patut maweh dana atiwa - tiwa manut pararem.
- (5) Pamangku, patut ngamanggehang sesana miwah agem - agem Pamangku

Pawos 31

- (1) Swadarmaning Pamangku, luwire :
 - ha. Ngenterang upacara piodalan ring kahyangan sane kaempon utawi ring pakubon sowang - sowang krama :
 - na. Prade sinalih tunggil Pamangku Kahyangan Desa kapialang utawi cuntaka, kengin nyelang Pamangku Kahyangan Desa tiosan, utawi nuhur sang sulinggih, katitenin antuk prajuru.
 - ca. Yan Pamangku kalayusekaran, wenang anglepas swadharma, kasulurang manut pararem.
 - ra. Yan Pamangku sampun tigang rahina ngayah ring Pura sane kaempon, kancit wenten kulawargannya kalayusekaran, Pamangku inucap tan keneng cuntaka, sakewenten nenten kengin budal salamin piodalan ;
 - ka. Mungguh tedun ring palinggih - palinggih Kahyangan Desa miwah ngiyasin pralingga - pralingga, manut pamastikan prajuru ;
 - da. Ngrajegang sesana Pamangku.

Pawos 32

- (1) Patias utawi olih - olih Pamangku, luwire :
- ha. Panyolasan miwah sarin canang rikala muput yajnya ring sowang - sowang pakubon krama ;
 - na. Luput pakaryan miwah reramon
 - ca. Polih apahtigan sarin canang rikala wenten aci ring kahyangan sane kaemponin ;
 - ra. Luput saluwiring prabean wewangunan ring kahyangan sane kaemponin.

Pawos 33

- (1) Pamangku kagentosin, riatukan :
- ha. Seda
 - na. Pinunas ngraga, menawi kageringan lan sapanunggilannya ;
 - ca. Kawusanang antuk krama, riantukan nilar sesana Pamangku
- (2) Tata carane nadegang miwah ngentosin Pamangku, kasulurang manut pararem

Pawos 34

Indik kasukertan Kahyangan, kadudonang sakadi ring sor puniki :

- (1) Sane nenten kalugra ngranjing ka Pura, luwire :
- ha. Sang katiban cuntaka, minekadi sebel ngraga :
 - 1) Sebel kandel ngrajaswala, salami dereng mabresih ;
 - 2) Sebel antuk ngembasang putra, salami 42 rahina, pateh ring sang karuron ;
 - 3) Sebel pangantenan, sadereng mabiakala utawi makalan - kalan ;
 - 4) Sebel riatukan kalayusekaran, jantos puputing sengker sane kaingkupin jeroning Pararem.
 - na. Makta sahananing bebaktan sane sinanggeh ngletehin, manut kecap sastra agama.
 - ca. Sato agung minekadi wewalungan suku pat, sajawaning rikala mapepada
 - ra. Anak alit sadereng mayusa tigang sasih
 - ka. Mabusana sane tan manut kadi tata caraning ngranjing ka Pura
 - da. Sadereng polih wak - wakan utawi pituduh saking Prajuru Desa
- (2) Tata busanane ngranjing ka Pura, kasulurang manut pararem.
- (3) Pratingkahe tan wenang ring Pura, luwire :
- ha. Masumpah utawi macoran, sajawaning pituduh Prajuru Desa

- na. Ngamedalang wak parusya utawi wak capala :
- ca. mabanyu, makoratan, masesenengan, makolem dados asiki lanang wadon, nyangsang busana ;
- ra. Ngias raga minakadi manahang wastra, menahang pusungan lan sakancan punika, sajawaning sang suliggih miwah pinandita.
- (4) Sewosan ring Pamangku tan kalugra munggah tedun ring palinggih - palinggih, sajawaning wit saking pituduh Prajuru Desa.
- (5) Sang mamurug kecape ring ajeng, wenang keni dewa danda, manut pamutus pararem.

Pawos 35

- (1) Yan wenten jadma karawuhing ring Pura boya saking nyanjan tur ngawinan kramane biapara, wenang keni dewa lan artha danda, sane kasulurang manut pararem.
- (2) Prade Kahyangan Desane kahanan durmanggala minakadi kapancabhayan, Pamangku patut digelis masadok rin Prajuru Desa.
- (3) Indik upakara / upacara pamahayun kadurmanggalan Kahyangan Desa, mapegamel kecap sastra Agama, sane kasungkemin olih Krama Desa.

PALET 2

INDIKRESI YAJNYA

Pawos 36

- (1) Sang pacang madeg suliggih utawi madwijati patut masadok ring Prajuru Desa miwah Parisada Hindi Dharma Indonesia.
- (2) Prajuru Desa patut ngawas lan nitenin tur wenang mialangin, prade kacihnan wenten indik sane tan manut kecap sastra agama, tur sareng nyaksi upakara / upacara padwijatiannya, saha nglantur nyiarang jeroning Paruman Krama Desa tegep rawuhing wates kawenangannya muput yajnya.
- (3) Krama Desa patut madana punia sapamadeg miwah ring panglepas Sang Suliggih riwekas, katuntun antuk Prajuru Desa.
- (4) Sang Suliggih wenang polih leluputan ayahan miwah peson - peson.

Pawos 37

- (1) Sajeroning muput yajnya, Sang Sulinggih patut ngutamayang muput yadnya ring wewengkon Desa Adatelatung sesampune puput, wahu muput yajnya ring wewengkon desa utawi ka dura Desa.
- (2) Krama desane sami, patut sareng ngawas lan nitenin katuntun antuk Prajuru, mangda sahanan yajnya sane kalaksanayang olih sowang - sowang Krama Desa, kapuput olih Sulinggih utawi Pinandita, manut kawenangannya sowang -sowang.

PALET 3
INDIK PITRA YAJNYA

Pawos 38

- (1) Desa Adat Belatung patut sareng nyanggra yang wenten sinalih tunggil krama sane nglaksanayang Pitra Yajnya
- (2) Tata cara panyanggrane inucap ring ajeng kasulurang manut pararem.
- (3) Dudonan pamargin Pitra Yadnya :
 - ha. Majalaran mendem utawi ngeseh, maka cihna makingsan ring Prethiwi utawi makingsan ring Geni, pinaka dharma antos nuptupang prabea ;
 - na. Majalarang upacara pangabenan utawi palebon ;
 - ca. Riwusan ngaben, patut kalanturang malih antuk upacara mamukur tur karuntutin malih antuk nglinggihang dewa pitara.

Pawos 39

- (1) Sinalih tunggil krama sane kalayusekarang / atiwa-atiwa, mangda masadok ring Prajuru.
- (2) Swadharmaning Desa :
 - ha. Bendesa adat patut maritatas sang kaduhkitan, napike kapendem, makingsan ring geni, utawi lantur keabenang.
 - na. Prade kapendem, raris kawentenang panepak kulkul tengeran kalayusekaran.
 - ca. Panyanggran Krama Desa salanturnya manut sekadi sane sampun kaunggahang jeroning pararem, jantos pependemane puput.
 - ra. Prade makingsan ring geni, panyanggran Krama Desa salanturnya, manut kadi dagang pararem, jantos pamargin upacarane puput.

- ka. Prade kaabenang, panyanggran Krama Desa salanturnya, manut kadi daging pararem, jantos pamargin upacara puput.
- (3) Tan kalugra nginepang bangbang
 - (4) Desane maweh galah ring sang kalayusekaran sajeroning pitung rahina kengin atiwa - tiwa, sajawaning wenten kabuatan tios saking sang yajamana.
 - (5) Larangan pependeman miwah palebon ring wewengkon Desa Adat Belatung kaungganghang jeroning pararem.
 - (6) Prade wenten kelayusekaran rikala piodalan ring Kahyangan Desa, kengin mendem tan pasadok, tur patut ngrereh galah mamargi rikala wengi.

Pawos 40

- (1) Desa Adat Belatung ngamanggehang indik cuntaka, mapagamel ring pamutus Mahasabha Parisada Hindu Dharma Indonesia.
- (2) Tatacara nyulurang kacuntakan, mapagamel kecap sastra Agama, kaanutang ring dresta desa, sane kaingkupin jeroning pararem.
- (3) Sinalih tunggil krama sane kahanan cuntaka, yan durung utas, tan kalugra nyarubin genah suci druwen Desa miwah druwen sowang -sowang krama.
- (4) Sang memurug, patut keni Dewa danda, manut pararem.
- (5) Sengker utas cuntaka manut kawentenannya, kasulurang sekadi ring sor puniki :
 - ha. Kalayusekar, cuntakannya kaanutang ring drestan desa miwah sastra dresta.
 - na. Ngrajaswala, cuntakannya tigang rahina ngawit saking ngrajaswala, utawi salaming ngrajaswala.
 - ca. Ngembasang putra, abulan pitung rahina ngawit saking putrane embas, ngentos katiwakin upakara / upacara tutug kembuhan.
 - ra. Karuron, cuntanya abulan pitung rahinangawit saking karuron, ngantos katiwakin tirta pamrayascita.
 - ka. Pawiwahan, cuntakannya ngantos sampun makala - kalan
 - da. Gamia gamana, cuntakannya ngantos sampun kapalasang, karuntutin antuk mrayascita sikian, Desa Adat miwah Kahyangan Desa.
 - ta. Salah timpal, cuntakannya kapuputang manut kecap sastra Agama miwah drestan desa.
 - sa. Anak istri mobot malantaran lokika sanggraha kandugi nenten katiwakin upakara / upacara pabiakawonan, cuntakannya ngantos katiwakin upakara / upacara pabiakawonan.
 - wa. Anak istri ngembasang putra malantaran lokika sanggraha kandugi pecak nenten katiwakin upakara / upacara pabiakawonan miwah Widhi Widhana.

cuntakannya, ngantos wenten meras anake alit, karuntutin antuk upakara / upacara manut kecap sastra agama.

- la. Sad atayai, cuntakannya ngantos sampun mrayascita sikian miwah ngesehin prawerti.
ma. Mamitra ngalang, cuntakannya ngentos katiwakin upakara / upacara pabiakawonan.

(6) Cuntaka kelayusekaran / kapademan :

ha. Kepademan, cuntakanya :

- 1) Cuntaka ka Desa, laminipun tigang rahina ngawit saking wusan mendem, ngentos sampun maprascita (mesapuh)
- 2) Kaluwargannya sajeroning pekarangan manut dresta

na. Kaabenang, cuntakanya :

- 1) Cuntaka ka Desa, manut dresta sane kapikukuh antuk pararem.
- 2) Cuntakan sang nyambut karya pitra yajnya, manut dresta sane kapukukuh antuk pararem.

(7) Sang katiben cuntaka, luwire :

ha. Kelayusekaran, sane cuntaka :

- 1) Sang kelayusekaran ;
- 2) Kulawargannya
- 3) Bebanjarannya

na. Ngrajaswala, sane cuntaka : sang ngrajaswala

ca. Ngembasan putra, sane cuntaka : sang mederbe putra, lanang wiadin istri, utawi yayah renan sang wahu embas.

ra. Pawiwahan, sane cuntaka : sane mawiwaha lanang wiadin istri

ka. Karuron, sane cuntaka : sang karuron rawuhing lanang nyane

da. Gamia Gemana, sane kacuntakan :

- 1) Sang nglaksanayang gamia gamana
- 2) Desa Adatnyane

ta. Salah timpal, sane kacuntakan ;

- 1) Sang nglaksanayang salah timpal
- 2) Desa Adatnyane

sa. Anak istri mobot malantaran lokika sanggraha kandugi nenten katiwakinupakara / upacara pabiakawonan, sane cuntaka : anake istri sane mobot punika.

wa. Anak istri ngembas putra melantaran lokika sanggraha kandugi pecak nenten katiwakin upakara / upacara pabiakawonan miwah widi widhana, sane cuntaka :

- 1) Sang ngembas putra ;

- 2) Putrane sane kaembasang.
- la. Mamitra ngalang, sane cuntaka : sang nglaksanayang mamitra ngalang punika.
- ma. Sad atatayi, sane cuntaka : sang nglaksanayang sad atatayi punika.
- (8) Sang keneng cuntaka, luwire :
- ha. Sang Sulinggih
- na. Pamangu Kahyangan Tiga rikala piodalan tur sampun ngayah tigang rahina ring Pura sane kaempon.

Pawos 41

- (1) Pamargin atiwa - atiwa utawi pangabenan kelaksanayang mapagamel kecap sastra agama miwah dresta.
- (2) Peputusan pangabenan, kasulurang manut pararem.
- (3) Pangingune ring Krama Desa, kasulurang manut pararem.

PALET 4

INDIK MANUSA YAJNYA

Pawos 42

- (1) Krama Desa, patut sareng nyanggra miwah nitenin yen wenten sinalih tunggil krama nglaksanayang Manusa Yajnya sane mabuat.
- (2) Tata cara penyanggrane inucap ring ajeng kasulurang manut pararem.
- (3) Sang pacang nglaksanayang Manusa Yajnya sane mabuat, mangda masadok ring Prajuru.
- (4) Manusa Yajnya inggih punika, upacara - upacara dharmaning kahuripan manusa, ngawit saking patemoning kama bang lan kama petak sajeroning garbha, ngantos kalayusekaran ri wekas.
- (5) Upacara - upacara inucap ring ajeng kamargiang kanista, madhyama. utama, manut kecap sastra agama miwah dresta.

PALET 5

INDIK BHUTA YAJNYA

Pawos 43

- (1) Desa Adat Belatung patut nyanggra pamargin Bhuta Yajnya, marep ring kabupaten Desa Adat Belatung
- (2) Pidabdab pamargin Bhuta Yajnya inucap ring ajeng, mapagamel ring kecap sastra agama, kaanut ring dresta Desa, sane kapikukuh antuk pararem.

- (3) Krama Desa patut sareng nyanggra sinalih tunggil krama sane nglaksanayang Bhuta Yajnya sane mabut.
- (4) Sang pacang nglaksanayang Bhuta Yajnya sane mabuat, mangda masadok ring Prajuru.

Pawos 44

- (1) Bhuta Yajnya marep ring kabuat Desa Adat minakadi carun sasih miwah sane liana, kasulurang manut pararem.
- (2) Indik pamargin palelastian utawi makiyis, kasulurang manut pararem.
- (3) Nangken warsam rikalaning Tilem Sasih Kasanga, patut kalaksanayang Tawur Kasanga, kalanturang antuk pangrupukan, pinaka cihna nyangra pangrawuh Nawa Saka Warsa (Tahun Baru Saka) ring pananggal apisan sasih Kadasa, sane kawastanin Nyepi.
- (4) Rikalaning Nyepi, sowang - sowang Krama Desa patut ngamargiang Catur Brata Panyepian, inggih punika :

ha. amati geni	:	tan kengin maapi - api
na. amati karya	:	tan kengin nyambut karya
ca. amati lelangwan	:	tan kengin maoneng - onengan, ngwijilang suara ghora, nabuh gegambelan, lan sakancannya ;
ra amati lelungan	:	tan kengin malelungayan mrika - mriki
- (5) Catur Brata panyepian punika kamargiang saking semeng jantos benjangne ngedas rahina.
- (6) Mangda pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidanda, sane kasulurang manut pararem.
- (7) Benjangne ring panggala ping kalih Sasih Kadasa, kawastanin Ngembak Geni, sowang - sowang krama patut saling ngaksamayang sane kawastanin Dharma Santi.

PANCAMAS SARGAH SUKERTAN TATA PAWONGAN

PALET 1

INDIK PAWIWAHAN

Pawos 45

- (1) Krama Desa, patut sareng nyanggra miwah nienin sinalih tunggil krama sane nglaksanayang pawiwahan.

- (2) Pamargin pawiwahan, luwire :
- ha. malantaran papadikan ;
 - na. malantaran ngorod utawi marangkat (ngrangkat) ;
 - ca. malantaran nyentana utawi nyentana nyeburin.
- (3) Indik pawiwahan, Desa Adat Belatung ngamanggehang undang - undang Nomor. 1 Tahun 1974, miwah Peraturan Pemerintah Nomor. 9 Tahun 1975, indik Pawiwahan.
- (4) Tatacara panglaksananya, mapagamel ring kecap sastra Agama, kaanutan ring dresta Desa, sane kapikukuh jeroning pararem.
- (5) Sinalih tunggil krama sane pacang nglaksanayang pawiwahan, mangda masadok ring Prajuru.

PALET 2

INDIK NYAPIHAN

Pawos 46

- (1) Prajuru Desa wenang sareng mawosan miwah nitenin yang wenten sinalih tunggil krama sane mapikarsan pacang palas marabi, gumanti nenten kadurusan dados nyapihan.
- (2) Yan krama inucap kukuh ring pikarsannya, Desa Adat nenten sumakuta ring pamarginnya.
- (3) Saderenge pastika polih pamutus saking sang ngawewenang minakadi Sang Rumawos (Pengadilan Negeri), krama inucap keni tetegenan krama, sekadi nguni.

PALET 3

INDIK SENTANA

Pawos 47

- (1) Prajuru Desa wenang sareng mawosan miwah nitenin yan wenten sinalih tunggil krama sane ngindikang sentana.
- (2) Indik sentana, Desa Adat Belatung ngamanggehang uger - uger jagat minakadi kawicaksanan sang mmaraga Guru Wisesa, kaanutang ring drestan Desa, sane kapikukuh antuk pararem.
- (3) Sang pacang ngrajegang sentana, mangda masadok ring Prajuru.

PALET 4
INDIK WARISAN

Pawos 48

- (1) Prajuru Desa minakadi Prajuru Banjar wenang sareng mawosin miwah nitenin yan wenten sinalih tunggil krama sane ngindikang warisan.
- (2) Indik warisan, Desa Adat Belatung ngamanggehang uger - uger jagat minakadi kawicaksnan sang maraga Guru Wisesa, kaanut ring dresta Desa, sane kapikukuh antuk pararem.
- (3) Sang pacang ngindikang warisan, mangda masadok ring Prajuru.

SASTHAS SARGAH
WICARA LAN PAMIDANDA
PALET 1
INDIK WICARA

Pawos 49

- (1) Sane wenang mawosin wicara ring wewenkon Desa Adat Belatung, inggih punika Prajuru Desa sane kawastanin Kerta Desa.
- (2) Prade sang mawicara tan cumpu ring Pamutus Kerta Desa, kengin nunasang ring sang Rumawos.
- (3) Sahanang wicara sane mawiwit saking kacorahan sakaluwire sane sinanggeh nungkasin daging awig - awig, pasuara miwah pararem Desa, patut digelis kabawosan olih Prajuru, nenten nyantos pasadik malih.
- (4) Sajaba wicara ring ajeng, patut nyantosin pasadok sang nunas bawos.
- (5) Panepase mangda pastika nyantenang iwang patut malarapan Tri Premana, inggih punika : Saksi, likita, bukti, tur panepase tan maren nepek ring Catur Dresta.

PALET 2
INDIK PAMIDANDA

Pawos 50

- (1) Desa, wenang nibakang pamidanda ring warga desa sane sisip.
- (2) Tetibak pamidanda inucap ring ajeng, kalaksanayang olih Prajuru.

- (3) Bacakan pamidanda, luwire :
- ha. ayahan panukun kasisipan
 - na. artha danda saha panikelnya, miwah panikel paturunan.
 - ca. rerampagan
 - ra. kanorayang
 - ka. Kawusanang makrama tur pipil karang ayahannya kawaliang ;
 - da. panyangaskara
- (4) Pamidanda sane katiwakang, patut masor singgih, manut kasisipan.
- (5) Jinah utawi artha brana pamidanda, ngranjing dados druwen Desa.

Pawos 51

- (1) Krama sane langkungan ring tigang paruman nglantur nenten nahur paturunan miwah dedandan, wenang karampag.
- (2) Tetibak rerampagan, nganutin tatacara sakadi ring sor puniki :
- ha. Kalaksanayang oleh Prajuru, kasarengin antuk krama pinih akeh tigang diri, maka saksi.
 - na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangargannya manut ring utang sang karampag.
 - ca. Prajurit patut miteketang mangda barang - barang sane karampag punika digelis katebus masenger awuku, tur ring kutus rahina pacang kalelang utawi kaadol.
 - ra. Tan kengin ngrampag saluwiring barang sane patut inggilang manut kecap sastra Agama, miwah mademang pangupajiwana sang karampag.

Pawos 52

- (1) Prade sang pacang karampag mialangin pamargin rerampagan inucap, mawastu sampun tan nganutin linging awig - awig, krama inucap wenang kanorayang.
- (2) Yan krama inucap manggeh piwal yadiastun sajeroning makudang - kudang paruman sampun kawehin patinget sakewanten manggeh piwal, tan wenten pamargi sewos, sajawaning krama inucap kawusang makrama Desa, tur pipil karang ayahannya kawaliang ring Desa Adat.
- (3) Rerampagan inucap ring ajeng kabawos buntas, risampun sang keni rerampaganpunika :
- ha. Nunas geng rena sinampura ring ajeng Krama Desa riantukan piwal ring pasubaya sane pecak sampun kararemin.

- na. Nahur pangargan panguwak pasubaya sadaweg pacang karampag, kadulurin antuk prayascita.

**SAPTAMAS SARGAH
NGUWAH - UWUHIN AWIG - AWIG**

Pawos 53

- (1) Nguwah - uwuhin Awig - awig Desa puniki, wantah kengin kalaksanayang antuk Paruman Krama Desa.
- (2) Pakarsane nguwah - uwuhan punika, mangda mawit saking pakarsan Krama Desa, yadiastun kamedalang antuk sinalih tunggil Prajuru utawi sinarengan.

Pawos 54

- (1) Sakaluwiring indik sane sampun kamargiang sadereng Awig-awig puniki kasurat, mangda kaanutang ring sadaging Awig - awig puniki.
- (2) Sakaluwir sane durung kasurat sajeroning Awig - awig puniki, menawi kangkat kanggen mitegepin Awig - awig puniki, pacang kasurat jeroning Pararem.

**ASTAMAS RAGAS
SAMAPTA**

Pawos 55

- (1) Awig - awig puniki kawastanin Awig - awig Desa Adat Belatung
- (2) Awig - awig puniki kamargiang ngawit kaingkupin utawi kararemin.

Pawos 56

- (1) Awig - awig puniki kararemin duk rahina Anggara Kasih Wuku Kulantir, pananggal ping 10 sasih ketiga, Isaka Warsa 2002, Tanggal 1 Oktober 2002, magenah ring Bale Desa Belatung
- (2) Awig - awig puniki kalinggatanganin antuk Bendea Adat Belatung miwah oleh sang ngawawenang manut kawenangannya sowang - sowang, tur kapikukuh antuk Murdhaning Pamikukuh : Bupati Tabanan

LUWIR SANG NGALINGGA TANGANIN

ha. Kapartame Prajuru Desa

1. Bendesa Adat Belatung

(I MADE SUKA)

na. Kaping Kalih Desa Dinas maka saksi.

1. Kelian Dinas Keridan

(I GST. NGR. NYM. ARYAYASA)

2. Kepala Desa Senganan

(I MADE KUASA A. Md.)

3. Ketua PHDI Kecamatan Penebel

(IDA BGS. KM. WIJAYA, S.Ag)

4. Ketua Badan Pelaksana Pembina
Lembaga Adat Kecamatan Penebel

(Drs. I KETUT SURNA DARMAJA)

5. Camat Penebel

(I NYOMAN GEDE GUNAWAN, S.Sos)

ca. Kaping tiga kawikanin olih :

1. Ketua Badan Pelaksana
Pembina Lembaga Adat
Kabupaten Tabanan

(Drs. I WAYAN DJAPA)

2. Ketua PHDI
Kabupaten Tabanan

(Drs. I MADE SAMBA)

3. PLT. Kepala Kantor Departemen
Agama Kabupaten Tabanan

(I GST. LANANG MUDITA, SH)

MURDANING PAMIKUKUH
BUPATI TABANAN

(N. ADI WIRYATAMA, S.Sos.)

Mengetahui dan Telah Dicatatakan :

Tanggal : 27 JANUARI 2003

No. : 189/24/HK.

KEPALA BAGIAN HUKUM
SETDA KABUPATEN TABANAN

(I G.A. PUTU SUMARPATNI, SH.)

**PITEGES LAMBANG DESA PAKRAMAN BELATUNG
DESA SENGANAN, KECAMATAN PENEHEL,
KABUPATEN TABANAN
WARSA 2002**

PITEGES LAMBANG :

1. SEGI LIMA : Pinaka Simbul Panca Crada
2. SUASTIKA : Pinaka Simbul Agama Hindu
3. CANDI BENTAR : Pinaka Simbul Arda Nareswari (Purusa Pradana)
4. PONDASI LAN LELENGEN : Pinaka Simbul Kaingkupan Krama/Pinaka
Bayun Desa Pakraman
5. TARU BELATUNG GADA : Pinaka Simbul Pangawit aran Desa Adat Belatung